

摘藻堂四庫全書薈要

集部

欽定四庫全書薈要

集部

御選明詩卷七

八

詳校官原任主事臣李斯咏

欽定四庫全書薈要卷一萬八千五百七

集部

御選明詩卷七

樂府歌行四

陸德蘊

春曉詞

窗明雲母光催曙
嬌鳥驚啼畫欄樹
流蘇複帳開芙蓉
枕屏殘夢猶朦朧
東方風來寒剪剪
蘭香熏衣藕絲軟
銀蟾隔簾斜墮雲
捲簾花霧春無痕

鳳臺曲

宮樹層層隱欄曲紫簟吹動參差玉秋聲嫋嫋月滿臺
青鸞銜信三山來弱流拍山險難渡飛瓊別掃叢霄路
綠香繡帳塵夢消紫篴聲沉鸞影遙金屏鸚鵡泣煙曙
海濶雲深不知處

高得暘

晚春曲

香雨飄紅換新綠雛鸞怨咽參差玉畫欄墜露泣殘妝

遠翠愁山蛾黛蹙勞勞乳鷺說烏衣海天凝雲煙草迷
東流苦長西日短惆悵花前鷓鴣卮繡幙深沉雨聲小
夢入神山良夜悄鏡裏韶華又一年曲渚雞鳴錦屏曉

郭文

竹枝詞

金馬何曾半步行碧雞那解五更鳴儂家夫婿久離別
恰似兩山空得名

秦旭

傷春詞簡繼芳

東風陣陣花狼籍老夫鉤簾空歎惜狂來扶病欲出門
門外春泥深一尺徐家園裏葛家樓回首繁華逐水流
安得紅顏生羽翼玉笙吹上崑崙丘

方熙

古別離

愁心不自聊撫我孤桐琴絲桐感人意絃急無好音拂
衣起歎息逍遙獨行吟遠望別離處江空煙水深

徐有貞

羽林子三首

珠袍年少子名冠羽林中獨佩流星劍雙懸明月弓陪
遊向何處還入華清宮

羽箭插腰間驛弓臂上彎自來從日馭常得近天顏借
問歸何晚長楊射獵還

相逢紅塵裏勒馬共徘徊笑語不及了同行忽見催問
當何處去明日上之回

少年樂

少年騎駿馬意氣兩相驕
馳騁春風裏人看滿渭橋

李賢

城上烏

城上烏啼月將落城外秋風起
寥廓烏聲啼罷露華晞
曙色蒼涼照長薄都門車馬集如雲
離筵勸酒何殷勤
酒闌人去櫂歌發明日烏啼何處聞

王誼

古意

獻玉無良媒漂淪寡歡豫壯齡已非昔馳暉日西驚嘉
木無榮柯脩條亦成故一感式微吟吁嗟在中路

秋夜思

北風淒淒寒雁飛明月皎皎穿羅帷空閨思婦不能寐
起望明月臨清池清池隱映高臺側月明正照交河北
錦帳連營夢不同同心百結空相憶相憶相思春復秋
月明應在望鄉樓妾心便是交河水日夜隨君向北流

關山別

蓮葉未青時沙頭話別離
舟行期早發日晏未曾移
遲迴一何久念我平生友
莫問去程遙且盡杯中酒
君今往何處萬里長城路
路遠人迹稀黃雲黯朝暮
隴阪歷欹傾雙輪不暫停
時聞嗚咽水流作斷腸聲
驅車無少息又度長蘆北
八月雁南飛天山草俱白
橫笛在高樓關山月裏愁
離人聽此曲白盡少年頭

班婕妤

玉簫夜涼新秋蛾暗裏顰如何天上月獨照掌中人

王惲

江南意

郎居橫江口妾住橫江上生小慣風波蓮舟喜搖蕩蕩
舟蓮花灣花紅照人顏舉頭見郎來低頭隱花間花疎
不成隱相見還相哂都緣春意深留連夕陽盡前洲伴
將稀那能不相違拋情明月下各自唱歌歸

張和

夜晏曲

銅盤絳蠟流晴虹
蜀絲步障圍香風
瑤釵寶髻光玲瓏
紅牙按腔白苧舞
仙袂翩翩欲輕舉
驚鴻翻雲雛鳳語
水晶簾箔搖寒星
金鴨腦麝流芳馨
蘭芽玉茁春娉婷
細簧悠悠歌宛宛
鯨吸流霞恨杯淺
曲闌露寒斜月轉

卞榮

歸來吟

日落春申港
雲歸巫子門
沙洲半江水
楊柳數家村

陳憲章

古有所思

采采紅芳日欲斜
盈盈珠淚落天涯
東風忽見籬前樹
惱亂春愁不為花

漁父詞效張志和體

紅蕖風起白鷗飛
大網攔江魚正肥
微雨過又斜暉
村北村南買醉歸

童軒

關山月

關山月揚清光塞上征人望故鄉故鄉千里音塵絕幾
回見月傷離別枕戈夜卧草頭霜彎弓晨走林間雪愁
雲茫茫塞草寒月痕斜掛白狼山一聲羌笛淒風急多
少征人念未還

竹枝詞

家住東吳白石磯門前春水浣羅衣朝來繫著木蘭棹
閒看鴛鴦作隊飛

石頭城外是江灘
灘上行舟候潮難
潮信有時還又至
郎舟一去幾時還

郎為功名走九州
妾愁日夜在心頭
無因得似白鷗鳥
隨著郎舟到處遊

西湖荷葉翠盈盈
露重風多蕩漾輕
荷葉團團比儂意
露珠不定似郎情

麗情曲

效溫體

海棠雨歇春夜長
輾轡驚夢飛鴛鴦
玉肌苦怯東風急

帳冷流蘇熏繡裳起來窺鏡倦梳洗玄雲滿屏飛不起
玉麟金爵翠翹新似與春光鬪明媚花牀曉霧香濛濛
春困泥人星眼朦簾鉤鸚鵡隔窗語恠殺東君深淺紅
試呼小翠卷珠箔一雙黃蝶花間落

自君之出矣二首

自君之出矣日日損儀容思君如木葉黃瘦怯西風
自君之出矣慵整玉搔頭思君如隻雁孤影下南樓

春曉曲

妖紅軟綠含朝陽鶯吟燕語愁人腸苔痕漬露翡翠濕
杏花撲雪臘脂香鳳衫輕薄春寒怯斜倚銀屏怨離別
藁砧一去歸未歸屈指東風又三月

柳枝詞

千絲萬縷畫樓前搖曳東風舞翠煙試問長年能送客
何如繫住別離船

春江花月夜

夜月懸金鑑春流颺錦帆江花如有意飛點繡羅衫

折楊柳二首

細雨染鵝黃絲絲拂水長
游人出門去惆悵惜春光
纔看葉鬪眉又見花飛雪
只愁秋風生長條不堪折

車遥遥

征夫將早適起拂車上霜
澹月殘星白遙思路正長
驅車出門遠少婦腸空斷
不見車上人但聆鐸聲轉
鐸聲去悠悠聞道成涼州
不識涼州路空懷萬里愁
愁來不能禦魂逐車輪去
願作石尤風吹折車前樹

江南曲

桃花斑斑落紅雨，玉缸春酒濃如乳。
吳姬白紵裁舞衣，

一曲嬌歌少年子。

曲名

江頭日晚停商舶，
衆中金多為上

客。當壚一斗沽十千，
引滿紅螺吸明月。
杯空月落江水

寒，勸君且宿茱萸灣。
遲明大舩挂帆去，
千里煙波傷玉

顏

張寧

襄陽樂

金
襄陽女兒夜行遊牽衣把袂大堤頭歌聲未歇笑聲起
唱處無情聞處愁珠璫玉珮搖春綠北渚南湖相間屬
至今荆楚宦遊人猶唱襄陽大堤曲

後浦漁歌

欸乃新聲度遠汀煙消日出樹冥冥年來悟得滄浪意
長近西堂竹下聽

莫愁樂

金雀玉搔頭生來喚莫愁自從懽去後不出石城遊

丘濬

採蓮曲

蓮花紅蓮葉碧紅似妾容粧碧如妾裙色輕紅易落碧
易衰情人道來竟不來停橈轉棹日過午藕絲斷盡蓮
心苦

春江曲

雨過水添波鴛鴦來漸多春江深可愛其奈別愁何

劉溥

看花吟

白日已墮地迴光燭青天人生時景只如此莫將眉目
誇盛年花開容易落花落難復開開落竟誰有對之心
為摧君不見玉山山下樹曾見主人羅笙歌主人去後
亭館廢空餘滿樹秋風多若將金玉駐光景鑒之前事
將如何

秋夜曲

絲繩玉瓶引深井冰厚銀牀夜初冷素手深籠倚轆轤

月明獨照娉婷影井上高高兩桐樹烏啼只在人愁處
金鳳銜珠壓鬢雲彷彿隨風欲飛去井水雖深有限期
人心有愁無盡時桐陰散亂月將落滴盡銅龍誰得知

沈愚

烏夜啼

月邊驚鳥尾畢逋夜飛三匝啼高梧綠牕織素誰家女
低蹙蛾眉淚如雨銀燈照影翠屏深聲聲似聽夫君琴
霜華滿庭天欲曙正是愁人斷腸處

吳娃曲

海棠含愁泣春雨弱柳垂煙鎖金縷東風裊裊吹晴絲
雙燕飛來向人語西隣小姬年十五細骨輕軀學歌舞
將身嫁與冶遊郎無奈花前別離苦琵琶撥斷鴟雞絃
玉釵擊碎鴛鴦股低眉斂恨對銀釭紅粉樓頭月當午
莫愁曲

光風轉蕙吹幽香遊絲薄霧春茫茫百壺綠酒勸郎飲
多情誰似盧家娘明珠雜珮聲玎璫鸞裾鳳帶茱萸囊

蛾眉八字寒翠濕星眸兩點秋波光楚腰衛髻桃花妝
敲金戛玉歌新腔牽雲曳雨歸蘭房

車遙遙

車遙遙聲轡轡西風吹車湍面塵阿郎愛走長安道不
惜愁老閨中春車遙遙去如箭郎歸來早相見

大堤曲

妾家住近橫塘隅鴛鴦紋繡紅羅襦蛾眉淡掃遠山碧
耳璫低垂明月珠蘭風吹散大堤上柳絲搖金花作障

玉壺清酒波粼粼
鯉魚尾雜猩猩唇
艷歌宛轉凝流雲
勸郎徘徊留好春
好春不留愁殺人

夜坐吟

漏板敲愁寒夜永
璧月流輝洞房靜
香鎖鴛鴦生微塵
阿姬抱恨嬌眉顰
褰裳起唱相思曲
秋葉滿階霜簌簌
含啼背影吹殘燭

房中曲

歲蕤繡帳垂蘭堂
湘簾搖月蝦鬚光
象牀塵污凌波鞵

雲鬢釵橫金鳳皇，
構欄深鎖鴛鴦窟。
翠被生寒愁兀兀，
玉奴夜搗紅守宮。
春風染透桃花骨，
蠟燈懸影碧窗紗。
青絲嘶騎不歸家，
琵琶撥盡相思曲。
楊柳籠門啼乳鴉，
春夜曲次趙公子韻。

重門漏盡烏啼歇，
冰簾冷浸沉沉月。
錦牀薇帳凝流塵，
腸斷蕭郎隔雲別。
媽紅落粉愁宵眠，
瑩篴怨入朱絲絃。
蠟燈高懸照孤影，
水沉香散茱萸煙。
柳驚花困芳心亂，
蝶思鶯情夢中見。
彩毫題就惱儂詞，
羞掩春風白團扇。

秦箏曲

高樓欲暮花含煙
嬌紅落粉愁無眠
含羞起舞銀燭前
玉纖輕抹鴛鴦絃
鴛鴦絃鳳凰曲
移妾心置君腹

金井怨

牽絲猶怯冷
照影却含羞
獨立梧桐月
芳心不奈秋

嬉春詞

酒盡情無極
花深眼欲迷
拂鞭歸去晚
月在畫樓西

閨門柳枝詞

枝枝搖翠綰香車占斷春風日未斜
記得臯橋舊遊處
綠煙深鎖泰孃家

蘇平

早春曲

青樓昨夜東風轉錦帳凝寒覺春淺
垂楊搖綠鶯亂啼
裊裊煙花不堪剪
博山吹雲龍腦香
銅壺滴愁更漏長
玉頰啼紅夢初醒
羞見青鸞鏡中影
儂家少年愛遊逸
萬里輪蹄紅無跡
朱顏未衰消息稀
腸斷天涯草空碧

和玉山倥侗生紫鳳曲

銀蟾帖天流素光玉峯仙人吹紫凰紫凰離羣發孤嘯
思入寒雲悲怨長餘音嘶風崖石裂梅花飛春墮香雪
馮夷宮中龍夜愁鮫人學語聲幽修江波淡淡寒不流
七十二峯凝暮秋急管繁絃不須數轉羽移商調尤古
空山野人踏哮虎隔竹江妃泣秋雨有時無聲似有聲
欲與彩鳳相和鳴秦王女兒去不返碧海三山夢魂斷

閭門柳枝詞二首

裊裊煙絲拂畫橋
紛紛春日上長條
館娃宮女能相妬
莫向東風學舞腰

拂水搖煙積翠深
闔閭城外畫陰陰
花飛便作浮萍草
恰似儂家蕩子心

鳳臺曲

月明露濕宮花影
夢斷瑤臺桂香冷
闌干縹緲碧雲齊
銀潢欲墮星斗低
紫簟吹殘綵霞墜
翩然同上青鸞背
青鸞背穩仙骨輕
玉妃笑倚珠宮迎
銅鳬漏盡秦樓曙

璫管遺聲落何處

古意

妾如江邊花君如江上水
花落隨水流東風吹不起

徐庸

君馬黃

君馬黃我馬赤君馬紫絲韁
我馬黃金勒兩馬馳騁長
安陌相逢宛若曾相識
公子王孫天上客玉鞭指點分
南北善和坊裏多青樓
不知今夜誰家笛

新絃曲

蠻工擘蠶冰絲香舊絃未斷新絃張移宮換徵再三按
金鴈鈿蟬光歷亂憐新棄舊非偶然始終那得長周旋
他日還當繫裙帶世情如此君休怪

玉階怨

宮院生秋草流螢入夜飛玉階零白露涼沁越羅衣

陸鈇

四時詞

滿地花陰翡翠涼半簾紅霧水晶香黃鸝似惜春無主
啼遍宮門不過牆

柳花臺榭汗銷香荷葉池塘趁晚涼十里翠萍魚點破
軟沙深處見鴛鴦

架上絺衣捲翠絲手中團扇怯風吹侍兒不識人心別
還把紅鹽洒竹枝

夢斷巫山獨擁衾笙歌聲迴夜沉沉無情不似銅龍漏
滴碎長門一片心

李東陽

屠兵來

兒勿啼屠兵來趙宗一綫何危哉千金賣兒兒不死真
兒却在深山裏妾今有夫夫有子死兵易立孤難九原
下報無慚顏趙家此客還此友穿何故亡盾何走誰言
趙家非晉臣當時嬰杵為何人

漸臺水

漸臺水深幾許使者來誰遣汝不見君王符空傳君王

語漸臺水行宮不可度妾死猶首丘君行在何處平生
委質身為君此時重信妾輕身君不還妾當死臺高高
水瀾瀾

昌國君

齊城下即墨守燕將代昌國走卑辭累使招不歸臣心
上有先王知先王知心獨苦義君臣邦父母當時誓死
却齊封更忍還兵向燕土終不侶信要劉胥報楚

樹中餓

山深雪寒路坎坷兩死何如一生可
挑才自信不如哀
君若有功何必我
楚王好士得燕才
燕家未築黃金臺
當時周室何為哉
吁嗟乎樹中餓死
安足惜何似西山
採薇食

鴻門高

鴻門高高屹屹日光盪雲霧塞雙舞劍三示玦壯士入
目皆拆謀臣怒玉斗裂網彌天龍有翼龍一去難再得

新豐行

長安風土殊不惡太公但念東歸樂漢王真有縮地功
能使新豐為故豐人民不異山川同公不思歸樂關中
漢家四海一太公組上之對何怱怱當時幸不烹若翁
臣不如

劉氏盟呂氏爭臣不如陵呂氏獮劉氏絕臣不如勃平
乎平乎智有餘胡為甘此兩不如茲言非智還非愚平
乎竟爾為身圖

牧羝曲

嗟汝陵咄汝律牴可乳節不可屈咄汝律嗟汝陵寧為
我死不作汝曹生生入朝身已老有淚猶沾茂陵草天
遣生還入畫圖不然誰識冰霜貌

馮婕妤

園門盡開熊不守婕妤當前衆嬪走荷君光寵捍君危
不然安用賤妾為君身如山妾如葉君有不虞安置妾
亦知倉卒非賈恩恩多妬深翻在睫馮婕妤昔非勇今
非怯掖庭佞兒何喋喋

九折阪

九折阪七尺身回車為孝子叱馭為忠臣孝子身為親
忠臣身為君七尺身九折道叱馭歸來人未老回頭試
問回車翁何曾得葬瑯琊草

四知歎

故人知君君不知故人下有厚地兮上有蒼旻縱不吾
知兮吾心有神金獨何為兮至吾門吾閉吾門兮省吾
身

嚴陵山

劉文叔加我足侯君房瞋我目平生若遣吾喪我有目
如盲足如跛安能城市復山林朝往暮還無不可君不
見嚴陵山水高復深誰哉更識先生心

弄潮怨

莫弄潮潮水深殺人莫射潮中有孝女魂魂來父與遊
魂去父與沉潮能殺人身不能溺人心潮水有盈縮人
心無古今

縛虎行

布將騎公將步天下紛紛可橫鶩卿為客我為虜卿為
一言無不可下邳城南繩縛虎曹公不怒劉公怒董卓
丁原在何處布乎布乎嗟汝布

鸚鵡曲

大兒孔文舉小兒楊德祖餘子碌碌不足數身著岑牟
前擊鼓襴生狂呼老瞞沮我辱衡衡辱我我欲殺之猶
雀鼠一投荆再送楚黃鶴磯頭賦鸚鵡鸚鵡才多為舌

誤舉世何人不相妬生莫逢仇主簿

聞雞行

城頭雞鳴聲不惡祖生夜舞司州幕南來擊楫向中流
殺氣橫秋盡幽朔手提一劍馴兩龍黃河以南無戰鋒
十州父老皆部曲誰遣吳兒作都督中原未清壯士死
遺恨吳江半江水

五斗粟

五斗粟不屈人五株柳不出門舉世不我容上作羲皇

民義皇夢不見一枕三千春

睢陽歎

將軍有齒嚼欲碎將軍有眚血成淚生為將星死為厲
盡是山川不平氣二人同心金不利天與一城為國蔽
強兵坐擁瞋相視孝子忠臣竟誰是千載功名亦天意
君不見河南節度三日至

司農笏

司農手中無寸鐵奪笏擊賊賊腦裂賊雖未死氣已折

奉天天子雙淚橫十年棄卿真負卿臣身區區勞記憶
平原太守曾未識

王凝妻

妾生愛身如愛玉玉可玷身不可辱生不逢魯男子彼
氓何知妾為恥揮刃斷臂不自謀已看此臂為妾仇不
恨妾身出無主但恨妾身為婦女君不見中原將相誇
男兒朝梁暮周皆逆旅

奇才歎

奇才復奇才二聖一語孤臣哀孤臣哀淚如雨衆欲殺
臣臣有主不然安得夢中身天上語

花將軍歌

花將軍身長八尺勇絕倫從龍渡江江水渾提劍躍馬
走平陸敵兵不能逼主將不敢嗔殺人如麻滿川谷徧
體無一刀鎗痕太平城中三千人楚賊十萬勢欲吞將
軍怒呼縛盡絕罵賊如狗狗不信檣頭萬箭集如蝟將
軍願死不願生作他人臣鄙夫人赴水死有妻不辱將

軍門將軍侍婢身姓孫收屍葬母抱兒走為賊俘虜隨
風塵寄兒漁船屬漁姥死生已分歸蒼旻賊平身歸竊
兒去夜宿陶穴如生墳亂兵爭舟不得渡墮水不死如
有神浮槎為舟蓮為食空中老父能知津孫來抱兒達
行在哭聲上徹天能聞帝呼花雲兒風骨如花雲手摩
膝置泣復歎雲汝不死猶兒存兒年十五官萬戶九原
再拜君王思忠臣節婦古稀有嬰杵尚是男兒身英靈
在世竟不朽下可為河嶽上可為星辰君不見金華文

章石室史嗟我欲賦豈有筆力回千鈞

滄浪吟

滄浪水清且閒朝持長竿去暮踏輕舟還江湖悠悠厭
奔走獨挂漁罾向溪口水面遊魚不避人江間白浪空
回首細草平沙帶綠蘋微風不動波粼粼忽如青絲颭
紅鱗低頭坐睡耳不聞亦知在興不在物江村水市徒
紛紛滄浪水清不濁耳可洗纓可濯江南風景殊不惡
耕田不如捕魚樂我家住在瀟湘東長向滄浪憶釣翁

借問磯頭舊江水春來幾度桃花風

長江行

大江西來是何年奔流直下岷山巔長風一萬里吹破
鴻濛天天開地闢萬物茁五嶽四瀆皆森然帝遣長江
作南瀆直與天地相周旋是時共工怒觸天柱折遂使
后土東南偏女媧補天不補地山崩谷罅漏百川有崇
之叟狂而顛坐看萬國赤子淪深淵帝赫怒罰乃罪神
禹來乘四載驅大章走豎亥黃龍夾舟穩不驚直送馳

波到東海朝離巴峽暮洞庭九派却轉潯陽城縈紆南
徐萬餘里更萬餘里通蓬瀛君不見黃河之水天上下
其大如股空縱橫長游清濟出中境曷敢南向爭權衡
千流萬派瑣瑣不足數雖有吐納無虧盈下亘厚地上
摩高空日月出沒蛟龍所宮奇形異態不可以物象但
見變化無終窮或如重胎抱混沌或如顥氣開穹窿或
如織女拖素練或如天馬馳風駿空山怒哮飽後虎巨
壑下飲渴死虹或如軒轅鑄九鼎大冶鼓動洪鑪風或

如夸父逐三足曳杖狂走無西東或如甲兵宵馳聚嘯
滿山谷或如神鬼晝露萬象出入虛無中吁嗟乎長江
胡為若茲雄人不識無乃造化之奇功天開九州十有
二山南北並峙江流其間堯舜都冀方三苗尚為頑魏
帝倚天歎征吳但空還吁嗟乎長江其險不可攀古來
英雄必南驚我祖開基自江渡古來建國惟中原我宗
坐制東南藩如知天險不足恃惟有聖德可以通乾坤
長江來自西極包人寰環帝宅我來何為為觀國汎吳

金
卷一
濤航楚澤笑張騫悲祖逖壯神功歌聖德聖德浩蕩如
江波千秋萬歲同山河而我無才竟若何吁嗟乎聊為
擊節長江歌

蘇臺曲

秋水光於黛新妝愛日斜隔溪深不語孤權入菱花
草深香徑合花冷櫺廊空惟有吳宮水春城四面通
樓臺春後掩環珮月中行莫上胥門望寒潮昨夜生

西湖曲五首

湖波綠如剪美人照青眼一夜愁正深春風為吹淺
不信湖中好儂身別有家翻愁歲華盡不敢采蓮花
風落平沙稻霜垂別渚蓮西湖三百畝強半富兒田
草碧明沙際花紅試雨初官船盪素槳驚散一雙魚
莫唱西湖曲湖邊歌舞稀儂家年少日遊冶誤芳菲

張泰

傷春曲

東風吹春染柳條晴花捲雪烘不消陌頭小輦輕遙遙

綠波無情漫藍橋
小雨生寒暖猶薄
盡日無眠倚朱閣
昨夜梨雲入夢香
腰肢舞困鞦韆索

春寒曲

鞦韆索上顛風生
儂家小院寒輕輕
柳眼低徊曉凝碧
花顏欲破春無情
半捲朱簾羅袖薄
芳塵妬繡窗間落
安得巫山十二屏
飛入瑤臺護香幕

初寒曲

金錢弄霜寒淺淺
小閣雲簾朝不捲
飄風赴閨羅袂單

翠襖開箱香冉冉薰爐試手龍媒溫半牀衾被愁黃昏
芙蓉落瓣荷榦禿幽鳬還傍南塘宿

遊仙詞

十二瓊樓麗紫清銀河隔座瀉秋聲翠鸞扶起瑤臺月
人在仙家第五城

海風吹縹蔚藍天山湧芙蓉月湧蓮對對凌波塵襪小
相逢多是水中仙

蓬萊水淺不容舫欲借瑤池養六鰲王母裁書報龍伯

仙源祗好灌蟠桃

龍女攜筐到日南
扶桑摘葉飼冰蠶
繅絲倩得鮫人手
為織紅綃製舞衫

仙人天上好樓居
門外離離種白榆
一曲洞簫吹向月
夜深驚起海中烏

魚軒碾破水中天
霧鬢風鬟從列仙
鼉鼓鼂鼂敲向月
洞庭君女嫁涇川

碧沙瑤草帶銀潢
天女停梭夜采香
也覺九霄風霧冷

不裁雲錦寄牛郎

熊盈娘子董雙成
王母前頭一對行
天陌偶逢秦弄玉
相將鳳管和鸞笙

鶴笙鸞駕隔蒼煙
天上那知更有天
不向九霄歌白雪
怕人知是小詩仙

金闕西廂玉案前
衆中誰是掌書仙
欲批小券支風月
借與琅函五色牋

姚綬

洛陽陌

馬上相逢處春風在洛陽陌頭楊柳色一一斷人腸

前有尊酒行

前有一尊酒俎豆亦共之青春未晚日桃李花開時且
歡娛無刺促尊若空酒再續

有所思

我思不在天上虎豹之九關我思不在海上三神山
苓芃芃繞晴麓隰榛翳翳沿清灣朝煙散兮雙鶴外夕

月落兮斷猿間跂予望之心孔殷奈何可望不可攀吁
嗟西方美人兮何日還

羅頎

艾而張

艾而張羅鷹鷂罔過但我欲致雲間鴻奈爾羣雀啾啾
何鴻之飛極天池掩浮雲矰罔施疇能頓天綱恢地網
鴻飛冥冥逝將往

芳樹

芳樹曷以花自賊樹何貴貴有質桂之香靡嘉實桃以
妍根則蝕柳以枝攀桑以葉摘俱不如松與柏挺孤直
物性固不同芳菲諒何益

巫山高

巫山高猶可陟江之永限南國我欲西遊誰為泛舟我
陸無輿我行安休翩翩悠悠鬱鬱陽臺靄靄朝雲有所
思思美人美人不可見猿狖今為羣猿狖隱爾形鳴聲
還獨聞黯山谷慘晨昏泣予淚盈衣巾嗟彼嗷嗷愁殺

人

野田黃雀行

十畝之間雀啾啾止蒿集萊鳴相酬遠川遙陌路孔修
原田茫茫禾黍稠秋來古樹風颼颼夕陽慘淡沉西丘
羣飛羣下不相求銜穗食穀安無憂南有樛木在芳洲
雌雄迫暮共依投咄哉茲禽多詭謀性行佻巧誰與儔
穿屋作巢於高樓食彼粢盛令人愁非羅非丸致無由
草竊奸宄將何尤吁嗟此鳥母久留願汝化蛤湮東流

賀麟

楊白花

楊白花隨風飛青春漸老胡不歸化為浮萍將安依美人
聯臂歌未歇宮樹烏啼冷秋月

丘吉

采蓮曲

細語呼人遠不聞水光搖蕩石榴裙一身肌骨無多重
欲入荷花化彩雲

折楊柳

牽馬綰青絲上馬折楊柳願作馬尾蠅遠近隨郎走

魏時敏

長門怨

露濕一庭苔鴉啼長門樹寂寞對孤螢飛入昭陽去

折楊柳

嫩葉柔條拂短簷鶯啼燕語曉風恬傷春無計留春住
怕見飛花不捲簾

程文杰

行路吟

有酒且莫斟聽我行路吟風霜滿面塵滿襟古皆然匪
獨今我勸君君毋怒今人行是古人路古人一去豈再
來笑殺今人不回顧朝行吟山沉沉虎狼關隘龍窟深
暮行吟木陰陰江南鷓鴣無好音行人莫道行路好多
少行人路中老

詹貴

商婦吟

莫作商人婦商人慣別離門前竹王廟日日卜歸期

王昇

讀曲歌

朝憶復暮憶展轉無消息芙蓉顛倒生蓮子中心側

程敏政

春社謠

我家社公耕鑿主求晴得晴雨得雨今春作社神更歡

值我一年新病愈牆下小桃紅滿枝塘東弱柳垂金絲
社飯炊香出茅屋臘酒一傾連數卮土鼓逢逢過林際
醉插山花共神戲隔隣雞犬喜欲狂接席兒童相笑詈
滿爇爐香焚紙錢大家再拜祈豐年放臣敢道金馬客
明日扶犁同下田

驅車上東門行

雉堞連雲起秦城屬漢家更無丞相犬猶有故侯瓜

蹋車行

田夫跣車如跣弩田婦跣車心更苦老天不雨將奈何
稻隴看看作焦土我行見此三歎息欲助農忙恨無力
假令一旱似往年豈獨憂貧復憂賊我雖七尺金紫身
聖恩許作歸耕人詩書不了餬口計與爾將來同苦辛
擊鼓揚旗禱神福且莫先憂食無粥賢侯恤民天所憐
好雨時來歲還熟

黃石操

并序

留侯遇圯上老父之事若近於怪以予觀之殆讀

史者之不審也史載老父與留侯約異日見濟北
穀城山下黃石即我也後留侯果得而祠之味史
之言乃老父自謂其年已邁後當葬彼以黃石志
其處亦猶莊子所謂索我于枯魚之肆耳留侯得
而祠之蓋尊其冢上之物示不忘其人也今乃謂
老父化為黃石豈理也哉予過圯上有感其事為
賦琴操一章

我營一丘兮濟水之碕有黃石兮燼如梔嗟日暮兮見

子無期子行矣兮為帝師乘車馬兮來何時索我兮安
之宿草兮離離懷敝屣兮下邳見黃石兮如台凝予睇
兮穀城之下有黃石兮志抔土思晤言兮吾翁渺予心
兮愁苦感翁惠兮一編書俾我兮侯萬戶駕言兮歸來
清觴豆兮潔肴俎嗟奉足兮無因寶茲石兮終古

張弼

絡緯詞

絡緯不停聲從昏直到明不成一絲縷徒負織作名蜘蛛

蛛聲寂寂吐絲復自織織網網飛蟲飛蟲足充食事在
力為不在聲思之令人三歎息

古意

望仙樓上仙人宴口吐晴虹眸閃電引杯酌海海欲乾
舉筆向天天亦旋瑤箋錦襲紫金藤欲向九重天上獻
青鸞黃鶴未歸來樓下碧桃開幾遍

楊一清

山中吟

春陽律轉先深山村村花柳回彫顏鳥鳴高樹聲闐闐
幾家煙火自村落春酒熟時相往還
兩旬天氣晴復陰黑雲故故團春岑耳邊時聽潭龍吟
深山大谷非可宿前途風雨愁人心

馬中錫

春怨

酒痕和淚點羅衣掌上纖衣瘦一圍燕子不來猶臥病
半簾紅雨送春歸

御選明詩卷七

欽定四庫全書薈要卷一萬八千五百八

集部

御選明詩卷八

樂府歌行五

王弼

古意二首

莫作河中水願為水上舟
舟行有返棹水去無迴流
蜘蛛結網疎春蠶成密織
密織不上身網疎常得食

古詞二首

妾淚如長江不洒陌上塵留取雙轍跡得認君車輪
君行轍不返妾淚長在眼試將眼中痕與轍較深淺

船上謠

連艘飛過石頭城獵獵黃旗發鼓聲中使面前傳令急
江南十月進香橙

鄭瑗

獨不見

東飛伯勞西飛燕我所思兮獨不見歲云暮矣多霜霰

日月推遷玄髮變
粼粼處廓誰與鄰
高山無蹊河無津
車粼粼馬駢駢
車馬縱橫徧城闔
獨不見意中人

王雲鳳

古意

中夜有所思
所思君不知
春風吹露草
秋風吹霜枝
所以別離人
悠悠負心期
別離非所惜
年華難再得
只恐君來時
妾已無顏色
顏色既已非
君寧無歎息

石珪

長相思

長相思長且深暮雲湘水愁陰陰海棠庭院燕雙語惱
亂無人知妾心妾登池上樓淚滴池中水水聲活活向
東流妾淚將心千萬里

行路難

盧家語燕棲畫梁美人夜半宴蘭房瑤琴欲奏絃更張
移宮換羽聲低昂歌喉舞袖競韶光花顏照人藕骨香
歡娛欲盡解鳴璫寧知杖策走咸陽君門咫尺不得見

空彈長鋏歌清商世路崎嶇行不易丈夫未遇同尋常
有所思

雙星熒熒隔秋水秋入城頭漏聲裏窗間梧桐風瑟瑟
青鳥南飛月華白朱絃一撥意已傳夢遶博山雙紫煙
藕絲易脫雲易散十二碧峯秋雨前

擬古將進酒

銅龍水澀蟾蜍泣桂花參差夜雲碧地上落葉何紛紛
花枝不似三春日鴻聲漸遠江水寒百年轉眼風月殘

夜深杯滿君莫難

陌上花歎

陌上花何離離秋風吹汝汝不知汝有丹葩及紫萼恨
汝不植瓊瑤池朝朝行人暮遊子泣露酣霞何日止花
枝漸減秋月寒獨抱餘芳道旁死不如三月楊柳綿猶
自飄颻帝城裏

迎冬詞

畫簷小鐵嘶北風疎櫳日影搖輕紅疊綺重茵夜雲暖

博山紫氣飛遙空霜淒落葉護寒井素綆縈紆指尖冷
翠屏東面繡新苔幻出瀟湘美人影日高寶瑟拂蛛絲
魚上深潭鵲遶枝十二闌干煙細細伊州一曲譜相思

涼風曲

涼風涼風汝勿至行人為君雙掩耳綠楊蕭蕭葉半脫
一步愁深千萬里昨朝猶著越羅裳今夜洞房添錦綺
百年展轉涼復暄綠髮絲絲今幾縷涼風涼風汝勿至
江天寂寥愁到爾

古意二首

秋水凝細縠秋月明雙杵江南燕欲歸來向簾前語
今日臨長亭明朝折楊柳落葉有相逢行人未回首

山中曲

峭石激湍響古城臨水居城東有渴叟不及水中魚

閨怨

當年人對月共說兩團圓如何人不見明月又今年

秋蓮曲

西塘菡萏初破紅小舟蕩漾東南風羅裙曳水蘼輕碧
驚起沙頭雙落鴻昨日采蓮蓮尚好今朝采蓮蓮已老
綠房結子空垂垂翠黛朱顏可長保江頭日暮生嫩寒
鴛鴦雙飛不過灘回頭女伴各無語淚灑銅仙承露盤

古別離曲

官楊何青青野花明道傍妾東君向西坐見道路長留
妾千金刀贈君雙鳴璫日月如流星歲暮永相望

折楊柳

千轍萬轍曉行車誰人折柳臨長渠紅顏皓齒春閨女
掩袂攀條獨無語秦樓不見吹簫人灞橋空有吟詩侶
天長海闊飛鵬翼迢迢直到天池息青瑣朱扉閉阿嬌
綺窗日暮生愁色

寄衣曲

越絲迴波翔紫凰丹芝水花相間香并刀剪綠藕絲脫
中有二十四鴛鴦碧窗夜寒鍼指冷一線未縫雙淚迸
秦雲隴樹千萬重欲寄還愁道塗梗封題錦字託衣中

殷勤先謝西飛鴻

雨鴈詞

猛雨斷哀鴈離離不成行
寒雲閉關塞落月暗瀟湘
樓中鼓角飛秋霜仰看孤影空
彷徨拈鍼繡作孤鴛鴦為
寄遠遊都下郎燈寒指冷夜
寂寂獨抱瑤琴為君泣

山中曲二首

綿水何太急奔流下東井
北登鳳凰山未曉見日影
朝登青石巖十步一駐馬
亦有紅顏人倚馬立巖下

夏鏞

前有尊酒行

玉壺乳酒一色同
素手提來笑春風
笑春風聽我歌流
光火急將奈何
默坐青軒散桃李
不如抱琰發陽阿
乘健出遊遨
開懷恣歡謔
前有一尊酒
何用銀球繫牀脚

沈周

楊花曲

江上楊花撩亂飛
隨郎馬蹄點郎衣
楊花飛多還墮地

郎去遙遙何日歸郎歸不歸任郎意但是家書無寄處
願栽楊樹遶天涯明年見花郎憶家

春歸曲

今朝三月三十日問春果是明朝歸春歸當向何處去
春亦不言花亂飛東家蝴蝶已無賴強逐遊絲揚落暉
青樓粉暗女子嫁朱門烏啼賓客稀春一去萬事非臨
岐更把一杯酒愁見牆頭梅子肥

吳姬曲

前年別郎三月暮東蕩西飄不知處願彈紅淚濕楊花
總饒輕蕩飛難去

江南思

落日川光暗迴塘鼓旋楫風吹綠鬢影相將亂荷葉放
聲歌采蓮何人知是妾

暗紡詞

貧家紡婦夜紡紗無油點火暗搖車紡多手熟不勞力
眼雖不見手明白車搖搖今夜迢迢今夜不作無明朝

來圖織布且換米早粥在鍋渾舍喜富家燒燭滿堂紅
彈絲調竹喧春風紡車嘈嘈只隔壁苦樂兩聲何不同

太湖竹枝歌二首

吳江長橋如長虹西來太湖橋下通我家落日水如鏡
照見人影在波中

蘇州南來是太湖少見楊柳多桑株誰家女子在樓上
手揭紅簾看打魚

史鑑

秦淮歌

停君金叵羅聽我秦淮歌
長江西來幾千里沿洄直入
臺城裏浮青蕩綠南北流
至今猶號秦淮水秦淮之水
能容舟秦淮之上花滿樓
美人卷簾垂玉鈎太白仙人
清夜遊酒酣乘月往石頭
棹歌渡淮水倒披紫綺裘
英風撼五嶽豪氣隘九州
邇來四千四百九十五甲子
無人繼此移山倒海之風流
水光依然月如故斷雲零落
令人愁豈無清歌與美酒
與子碌碌誠堪羞我歌秦淮

歌送君秦淮去城西酒樓在何處主人今非舊孫楚且
須痛飲歌達曙達曙歌醉方寢笑壓吳姬股為枕滿身
糝糊覆宮錦明年我亦泛秦淮手解金龜就君飲

震澤竹枝詞送中書李舍人二首

太湖東與海相通大浪掀天難使蓬今夜且來洲裏宿
明朝又怕日高風

鴉鵲羣飛過別村烏雲接日晚昏昏西風一夜翻湖起
大小人家水到門

錢百川

江南曲

湖南采蓮花
湖北采蓮葉
回頭見郎來
低頭理雙楫

朱朴

秋夜吟

風披披露淒淒
草蟲互相語
林鳥無定棲
人來不來關
塞隔月出未出
天河低
誰家屋頭烏
夜啼

錢福

少年行

荻芽新長河豚肥吳姬作羹俊味稀金陵子弟快一飽
挾彈走馬穿花歸

祝允明

寶劍篇

我有三尺匣白石隱青鋒一藏三十年不敢輕開封無
人解舞術秋山鎖神龍時時自提看碧水蒼芙蓉家雞
未須割屠蛟或當逢想望張壯武揄揚郭代公高歌撫

匣臥欲哭干將翁幸得留光彩長飛星漢中

秋夜曲

明月深穿轆轤井蕉梧戍削藏石影房帷螢火入還出
綃被輕圍明玉冷

彩雲東飛月向西效李紳相公鶯鶯歌

彩雲東飛月向西分光換影雙悽悽月華再與行雲遇
人間有情誰是主障紅掩綠心色幽歡情不滿哀怨稠
傷鸞恨鵠如何許兩聲嘈嘈向歸路

曹鏐

楊白花

楊白花輕且微春風吹逐何處飛春陰冥濛千萬里花
小不愁飛不起重門深鎖寂無人夜永如年月如水

許天錫

楊白花

春宮深深春晝長楊花起舞春雲香隨風忽度江南水
蕩漾楊花幾千里楊花流落向天涯宮樹朝鴉復暮鴉

李汎

柳枝詞

不唱春風楊柳詞
繁華過眼已多時
于今楊柳非前比
有此繁華無此悲

杭濟

楊柳枝詞

玉溝縈繞水煙涼
嫩葉垂垂窵地長
百尺宮牆遮不盡
飛花猶自入昭陽

東風裊裊拂朱闌
萬樹千條露未乾
玉簫聲中人不見
倚樓煙雨正春寒

許讚

白柘歌

官灘與白柘開門
風掃舍舟人來往
愁阻風累鹽換酒
消今夜

白紵詞三首

歌白紵歌初起
白紵白於水靚妝
舞衣更旖旎珠簾委

地氍毹紫花搖雪蕩不知止
堦下鹿子眠青枳彩虹宛
轉玉壺裏

歌白紵歌正長白紵白於霜
鴛鴦瓦蓋金雀堂刺梅花
開撲酒香金蓮蹙皺湘波裳
耳邊明珠星月光黃金教
舞不惜償

歌白紵歌欲徹白紵白於雪
燈殘月墜弛芳纈夢遶陽
臺光影掣繁華富貴炙手熱
秋月春花當令節金馬銅
駝徒望切

采蓮曲

東塘水滿飛鴛鴦西塘柳暗鳴鸝黃
短篙搗破綠波光采蓮船上裊紅粧
風搖翠袂藕絲裳明眸皓齒歌聲揚
高樓羽扇白面郎垂楊繫馬氣非常
盈盈一水隔參商鶯聲漸杳過前塘
柳漫高樓心獨傷

青青水中蒲

青青水中蒲岸上有芳樹遊子東西行
樹指東西路青青水中蒲水邊石子見
人心盡難知世情惟逐面

青青水中蒲葉上白露瀼白露易為霜鴻鴈來雙雙

古意

少婦晨汲泉花面照清漣水流入江湖揚波過郎船願
言曾見妾水際泣嬋娟

熊卓

采蓮曲

采蓮復采蓮盈盈水中路鴛鴦觸葉飛卸下團團露

唐寅

短歌行

尊酒前陳欲舉不能感念疇昔氣結心寬日月悠悠我
生告道民言無欺秉燭夜遊昏期在房蟋蟀登堂伐絲
比簧庶永憂傷憂來如絲紛不可治綸山布谷欲出無
岐頰頰若穴熒熒莫絕無言不疾鼠思泣血霜落飄飄
鴉棲無巢毛羽單薄雌伏雄號緣子素纓灑掃中庭躑
躑躅躅仰見華星來日苦少去日苦多民生安樂焉知
其他

驄馬驅

悠悠驄馬驅道阻歲云晚豈無同袍士念子不能飯木
落辭故枝去家日以遠鳴雞戒前途夕暝猶策蹇筋力
已非舊淚下不可卷

林庭棊

江南曲

鳥鳴花樹繁春滿江南道不見花下人但坐原頭草

陸深

江南行

僕本江南士請歌江南篇江南佳且麗沃野多良田道
旁采桑女湖中木蘭船禮讓季札後文學言偃前崑山
產良玉自古盛才賢東通滄海波西接闔城煙既饒魚
稻利復當大有年登眺何鬱鬱井市互糾纏商賈競啓
關逋流願受廛使君楚邦彥敷治若烹鮮新從天上來
端坐理徽絃齊民本同性嗜好貴有先谷中自虛曠豈
曰聲難傳酌酒聽我歌我歌慎勿諛

東家行

東家有女嫁西家不羞白壁倚蒹葭結髮初疑連理樹
牽情復比並頭花並頭連理願千秋夫婿今年輕薄遊
鬪雞遠過夷門市繫馬時從白下樓鬪雞繫馬聊應爾
可憐年華付流水月離三五弓下弦春當九十花成子
千疊關山音問稀傳言絕塞寄征衣身騎大宛烏龍去
手取將軍金印歸烏龍金印兩難成邊境蕭條不可行
黃沙萬里雙睛暗白雪千山五月明風月空閨難獨守

團扇絺衣豈堪久
瑩篴弦上公渡河
羌笛聲中折楊柳
楊柳秋來滿故園
良人何日返東門
黃金繞身久離別
不如貧賤暫溫存

擬飲馬長城窟行

密密牆頭柳淒淒野中露徘徊念遠人
即目不成覩別離誰不然相思逐流年
日短願夜長夢中得相憐食荼知味苦
登高知路長耿耿懷隱憂雙輪繞柔腸
客來異鄉縣遺我一匹絹雙手認封題
中有夫婿書上言紫貂

敝下言近瘦肥持刀欲裁衣仍將比殘機

楊白花

楊白花隨風起春風吹江隔江水楊花飛渡江水東綺
房繡闥珠簾櫳不恨花無主但恨花無力一夜風來留
不得

步虛詞

芙蓉花下石闌干茅屋空山生早寒養得一雙朱頂鶴
有時騎向碧雲端

谿後谿前路百盤白雲常護禮星壇麻姑使者傳書到
一派簫聲雙紫鸞

天津櫂歌

滿船簫鼓載春歸燕子銜泥掠岸飛楊柳風多黃鳥健
桃花水漲白魚肥

李夢陽

河之水歌二章

有序

河之水歌李子為其子作也以子追不及

河之水流濺濺望父不見立河干

河水澍澍舟子搖櫓東方漸明我不得渡

招隱山辭三章

山之桂青青秋風綠葉冬不零王孫幾時歸山空蕙草
摧

山之草萋萋春風花發桃源迷子規啼竹陰日暮愁人
心

秋之夕螢飛山風霜露霑人衣洞門翳寒蘿奈茲華髮

何

車遙遙

車遙遙遙遙復邁邁望見秋塵起不見車輪轉知在秋
塵裏

轅駒歌

世徑互險夷富貴安所需昔為櫪中駿今為轅下駒白
日仰悲鳴青雲立踟躕未蒙主人顧何繇效馳驅朝思
碣石津夕睇流沙隅長恐侶凡蹇棄捐中路衢

采菇曲

白如玉簪香如玉田禾行人且莫行聽我采菇歌儂
家住在黃河曲一日波濤怨殺河河來有魚去有麥麥
下秋霜菇菜多不求河向城南去只願年年河不波

塘上行

蒲生何離離過時采者稀莫言采者殊盛衰自有時

解一

昔與君相見不謂行當變讒言使交流水清石自見

解二

孔雀東南飛十步一徘徊羅鷺羽翼短安可作雄雌

解三

今日樂相樂飲酒行六博蒲生枝葉多中心亦不惡

解四

怨歌行

怨違情有悲懽聚理無欺懽怨非中則感離難重持纔
見春華交條已晨露滋秋風吹羅袂團扇不復施團扇
與羅袂用舍各有時炎寒啟迭運超曠多遠期勿徒歎
捐棄恩愛倘中移

湘江吟

對酒歌綠漪歲晏懷佳人山寒翠袖薄微霰沾衣巾空

持紫鸞簫欲致愁無因日暮湘江曲浩蕩煙波春

湘妃怨

采蘭湘北沚寒木澧南潯淥水含瑤彩微風託玉音雲
起蒼梧夕日落洞庭陰不知篴竹苦惟見淚斑深

時命篇

代馬不戀越荆禽豈巢燕鸛鴒渡汶水君子憂未然奈
何客遊子率爾辭故山行獸顧丘林出雲有歸還交友
聲利塗軒車日駢闐誰念牛下人悲歌夜中歎豪門有

棄襦我衣恒不完張儀懼諸侯泄柳乃閉關貧賤豈盡
愚時命當自安

西來行

冬廿六日十二月西來泛湖雨明滅雨寒著樹盡成雪
天波靄靄路幽絕鵠鷗禿鶯立如人銜魚避船偷眼嗔
雪晴獵夫會尋汝乘時早可收其身

洛陽道

桃花馬金絡頭白面郎紫貂裘三月洛陽道垂柳蔭清

溝溝水東流不記春花開花落幾回新東風日暮楊花
起愁殺高樓獨倚人

楊花篇

洛陽三月東風起楊花飛入千門裏只見朝縈上苑煙
那知夕逐東流水苑煙流水無休歇暖日輕盈度仙闕
趙女瑤臺貯綵霞班娘團扇啼明月綵霞明月幾沉輝
陌上行人亂撲衣征夫柳塞愁看鴈少婦深閨懶上機
柳塞香閨萬餘里草色連天度隴水玉門關外雪猶飛

章臺樹裏風先起誰家浪子千金馬
平明挾彈章臺下頭上羅巾玳瑁簪
腰間寶玦珊瑚把踏絮來尋賣酒家
持香坐調當壚者當壚美女怨陽春
笑掇楊花襯繡茵青樓薄暮難消遣
白雪漫天愁殺人冥冥漠漠春無極
此時惟有楊花色一朝風雨蘼蕪爛
獨摻垂條三歎息

豔曲

父母愛小女女是聰明子生不識鴛鴦繡
出鴛鴦是

子夜四時歌

錄二首

共歡桃下嬉心同性不合懽愛桃花色妾願桃生核
柳條宛轉結蕉心日夜卷不是無舒時待郎手自展

春曲二首

春風度山閣凭軒望江路簾動時有香不見花開處
翩翩誰家燕銜泥向何所避人花叢裏忽復梁間語

楊白花

寧唱采菱曲休歌楊白花菱生猶有蒂花去落誰家

相和歌

美人羅帶長風吹不到地低頭采玉簪頭上玉簪墜

月夜吟

月出東方高刺刺燈下語漂搖林中籜淅淅如寒雨

夸門曲

黃河岸頭多客船大堤小堤楊柳煙獨樹花開特造次
鄰家香醪不索錢

南堤二月杏花紅北堤高樓紅映空珊瑚寶玦誰家子
繫馬門前青樹中

白紵曲

吳中女兒白紵衣薄暮橫塘蕩漿歸荷花港裏無人見
驚起鸕鷀隊隊飛

何景明

河水曲

河水何濺濺暮采河邊蘭君隨河水去我獨立河干

羅女曲

羅女年十五自矜好顏色山葉雜山花插髻當首飾蠻

方立門戶男女多生涯昨聞城中市女出男在家上市
買黃絲染緝作花布裙短衫袖長不惜雙腳露夜行山
中道何處吹蘆笙我歌連臂曲曲罷動郎情動郎情與
郎匹生女復長男三年始同室

獨漉篇

獨漉獨漉驅車折軸不畏折軸但畏車覆茫茫者猶生
彼中衢雖有蘭蕙當門則鉏同行竊金相顧道左我實
不知彼則畏我食荼知苦食梅知酸狐裘之敝可以禦

寒有虎斑斑伏於林下我欲射虎愧無勁弩肅彼北風
渡彼中流豈不懷憂與子同舟

短歌行

冉冉秋序肅肅霜露蓄我旨酒召我親故鳥歡同林水
歡同源矧我同鄉胡能弗敦耀靈西藏明燈在室更長
夜良可以繼日園有藝菊庭有樹蘭秋芳是悅春榮曷
觀高陵可升海水可測出門異路安知南北生年幾何
去者日多子不我樂聽我短歌

塘上行

蒲生寒塘流日與浮萍儔風波搖其根飄轉似客遊客
遊在萬里日夕望故州鷓鴣鳴歲暮蟪蛄知凜秋暑退
厭絺綌寒至思重裘佳人不與處圓魄忽四周房櫳淒
鳴玉紈素誰為收白雲如車蓋冉冉東北浮安得雲中
雁尺帛寄離愁

采蓮曲

急歌太短緩歌長清風夕回素雲翔雙鳬飛起向橫塘

荷花不言空斷腸
明月宛轉流西方
月中白露霑衣裳
紅顏青鬢安能常
萬歲為樂莫相忘

秋江詞

煙渺渺碧波遠
白露晞翠莎
晚泛綠漪兼葭
淺浦風吹帽
寒髮短美人立江中流
暮雨帆檣江上舟
夕陽簾櫳江上樓
舟中採蓮紅藕香
樓前踏翠芳草愁
芳草愁西風起
芙蓉花落秋水江白如練
月如洗
醉下煙波千萬里

瑤瑟怨

美人竹間亭虛簾空月華相思湘江曲淚竹生斑花花
開為誰好花落不復掃出戶見春風低頭怨芳草坐彈
五十絃起視江月殘愁絃不堪聽手澁金鴈寒一彈正
淒切再彈轉嗚咽三彈撥幽腸聲亂冰絲結西風吹芙
蓉一夜落微紅豈知瑤瑟音能消青鏡容

觀舞歌

今夕何夕燈滿堂金釵夜舞華瑟傍香風拍袂紅霞舉

玉腕矯矯凌虛翔飄飄雲步蕩輕珮八鸞協律鳴鏘鏘
花柔玉軟兩無力宛轉應節隨低昂蟠身蹲伏龜鶴息
延頸直時螭龍長明珠圓轉盤四角新蓮裊娜波中央
繁歌急調相迫促紫燕雙入虛簾忙粉脂凝汗朱顏發
明月空梁添素光座中豪客燕趙產快賞一舉連十觴
吳才雖不勝杯酌能握綺筆揮詞章聊酬一曲當縑素
清腕不讓湓陽郎湓陽涕泗苦不足風流詎及吳才狂

白紵歌

手中色絲舊所治青紅碧綠當自知衆中不語心向誰
感君厚恩私念之東流之水不西馳泰山在前不可移
紅顏白首奚足辭

行路難二首

牀有織綺篋有織素請君視綺還視素憐新不如莫棄
故樽中有酒盤有餐聽我為歌行路難衆中歡樂多志
氣豈知他人不得意白日有時不照地安得保君常不
棄

天河熒熒西北轉織女牽牛不相見由來天上亦別離
何怪人間有悲怨世情磷薄惡衰賤駕車騎馬有人羨
少年不得君愛惜紅顏勝人亦何益

俠客行

朝入主人門暮入主人門思殺主仇謝主恩主人張燈
夜開宴千金為壽百金錢秋堂露下月出高起視廐中
有駿馬匣中有寶刀佩刀躍馬門前路投主黃金去不
顧

車遙遙二首

寒雞喔喔知夜半鄰翁春梁婦炊飯僕夫聞雞趣車起
欲明未明行十里火輪飛出扶桑霞羲和騎龍鞭日車
君看日亦無閒時我車安得常在家

車遙遙望望行塵滅但聞上車語不得下車別

雙燕篇

雙燕何翩翩飛去仍徊翔依依止畫閣繾綣鳴東廂昔
來屆陽節今去易寒涼祇恐秋風高海路多煙霜雙飛

入君戶雙棲在君梁被蒙君仁惠彈射不相妨養雛毛羽成送雛還故鄉雖無黃雀報歲願巢君堂

種麻篇

種麻冀滿丘種葵冀滿園孤生易憔悴獨立多憂患當行思故旅當食思故歡先機失所豫臨事多嗟歎升蕭艾乃至鉏柱致傷蘭物理有相附疇能識其端斷金俟同志抱玉難自宣交結良匪易君當圖未然

邯鄲行

邯鄲道上車馬多行人夜火渡漳河邯鄲女兒年十五
能彈琵琶善歌舞青燈朱戶夜當壚壚頭酒熟喚客沽
玉壺青絲為君繫不妨醉向邯鄲途君不見邯鄲市昔
日繁華安可擬鳴鑾佩玉青雲間鬪雞走馬紅塵裏平
原門前客如雲千載淒涼竟何是黃金白壁成飛灰歌
樓舞榭空流水傷心萬事俱可嗟草長叢臺白日斜廢
苑當時在何處舊宮今日作誰家古來富貴俱寂寞有
酒樽前胡不樂

大梁行

朝登古城口夕藉古城草日落獨見長河流塵起遙觀
大梁道大梁自古號名區富貴繁華代不殊高樓歌舞
三千戶夾道煙花十二衢合沓輪駟交紫陌鳴鐘暮入
王侯宅紅粧不讓掌中人珠履皆為門下客片言立賜
萬黃金一笑還酬雙白璧帶甲連營殺氣寒君王推轂
將登壇彎弧自信成功易拔劍那知報怨難已見分符
連楚越更聞飛檄救邯鄲一朝運去同衰賤意氣雄豪

似驚電楊花飛入侯嬴館草色淒迷魏王殿萬騎千乘
空雲屯綺構朱甍不復存夜雨人歸朱亥里秋風客散
信陵門川原百代重回首宋寢隋宮亦何有遊鹿時銜
內苑花行人尚折繁臺柳繁臺下接古城西春深桃李
自成蹊朝來忽見東風起薄暮飛花滿故堤

豔曲三首

御溝連上苑大道接平沙紫陌三千騎青樓十萬家城
中楊柳樹風起暮飛花

高堂臨萬戶朱構耀城隈共藉鴛鴦綺雙持鸚鵡杯春
風樓下度一夜百花開

粲粲東城子盈盈南陌姝自矜夫婿貴翻笑使君愚日
暮采桑去空迴五馬車

白雪曲二首

暗逐梁塵起潛隨燭影流似憐歌舞處故入高樓
梅花開雪中相看鬪奇絕常教雪似花莫遣花成雪

竹枝詞

十二峯頭秋草荒
冷煙寒月過瞿塘
青楓江上孤舟客
不聽猿聲亦斷腸

徐禎卿

遊俠篇

四牡飭朱軒
俠氣何翩翩
夕驚邯鄲道
朝馳函谷關
千金飾冠劍
寶服芳且鮮
徒御若雲浮
周道直如弦
堂中養死士
被服皆珠紈
櫪馬厭梁肉
貝甲委如山
片言傾五嶽
萬乘慕其賢
諸侯奉白璧
為壽卮酒前
合從連趙

魏駕轂出齊燕仗劍歸質子矯節奪兵權
皦皦日中議歆血重一言雞鳴脫虎口
狗盜乃獲全天地相盪蝕四海如沸淵
憑軾一抵掌解紛談笑間縱橫負奇節
逸氣蓋八埏慷慨功名會何言七尺捐
策勲山河溢流光竹帛鐫何為坎壈士
撫劍獨長歎

苦寒行

凜凜朔氣運悠悠玄象馳北鄙何蕭條
漠野恒淒其崇霜依岫結峨冰憑岸滋
飛砂塞門來胡馬厲長悲漂漂

密雪興轂繁雲垂窮獸啼原澤飢鳥號樹枝無衣歎
秦風卒歲咏豳詩伊予炎荒士飄飄寄邊陲風土有本
性狐貉非所宜飲漿豈執熟懷纊猶抱絺處燥常畏瘍
久涼誠惡痺寄謝父與母遊子難久居

白紵歌二首

三星爍爍花滿堂素腕盈盈出洞房垂羅映縠耀明妝
皦若雲中開月光流情盼君君莫忘停歌節舞進玉觴
願君安坐夜未央

旨酒千壺列東廂美人如花嬌北堂高歌合舞聖世昌
願得歡娛永未央脂車秣馬且踟躕百年之會忽須臾
東流之水西飛鳥今我不樂何為乎

鷓鴣行

白鷓捉黃雀斜盤下九天豈知南山側復有虞人弦一
發中雙翼忽斃青雲端行人皆撫掌仰視落飛翰弓矢
懸馬頭少年坐雕鞍持歸咸陽市百鳥爭聚觀美酒白
玉缸肉脂黃金槃樂哉今日宴四座爭萬年

青門歌送吳郎

吳郎醉嗜長安酒落魄自言為客久走馬頻看上苑花
回鞭幾折青門柳青門瞳瞳魚鑰開乳燕游絲相逐來
柳下雕鞍留別袂花間酒琰覆蒼苔浮雲去去辭城闕
芳草連天那可歇野店春風聽早鶯關河曉樹懸新月
千里淮流雙畫橈廣陵驛前逢暮潮落日帆歸揚子渡
青山家對伯通橋吾家流水原非隔宛轉胥臺通巷陌
草長難尋仲蔚居林深不辨陶潛宅清溪屋下可垂綸

復有萼萼足獻親君歸儻食冰絲膾為念羈棲塞北人

落花怨

青枝參差露華浥落花辭春不能泣芳閨年少對躊躇
有情無言空怏悵落花含羞擬謝問顏色與卿不相及
江上橫波暮轉深江干燕泥生紫蘋前程零落不可保
多謝嬌癡薄命人

榆塞歎

榆塞西來草似煙洛陽東望月如錢迴腸時時轆轤轉

蘭心夜夜膏火然蟲吟下牀露入幔天河沈沈雲曼曼
青桐玉井一葉秋滿城寒砧星物換空傳草草一行書
誰寄遙遙千里歎會日苦少別離長人生失意恒過半
楚妃怨

綠戶朝寒掩高閣冉冉東風暗吹幕美人春倦煙夢長
深鎖青苔任花落

結客少年場行

雪刃親將報不平千金購首未分明醉遊酒市無人識

自鬻朱門變姓名

大道曲

長安樓閣互相望
戶戶珠簾十二行
綠水過橋通酒市
春風下馬有垂楊

從軍行二首

從軍去國心千里
遠夢經年不到家
老望鄉關憐淚盡
西風吹恨過龍沙

青天磧路挂金微
明月洮河樹影稀
胡鴈哀鳴飛不渡

黃雲戍卒幾時歸

古意

我有木蘭舟欲作三湘客不愁湘水深但畏湘中石

擬蕭子顯春別曲

雜草積色滿河塘楊柳覆額映嬌黃春心春望不可極
隴北遼陽俱斷腸

霧裏纖纖新月光機中少婦纖流黃可憐斷絲不如淚
零落時續不能長

江南樂八首代內作

生長在江南不愛江北住家在閭門西門垂雙柳樹
陽春二月時桃李花參差寄言諸姊妹莫遣惡風吹
還鄉信自樂望近轉於邑阿母見兒歸定自持儂泣
野鳬生雛時乃在河沚中可憐生羽翼各自戀菰叢
橘生江上洲過江化為枳情性本非殊風土不相似
人言江南樂江南信自樂采桑作蠶絲羅綺任儂著
與郎計水程三月定到家庭中赤芍藥爛漫齊作花


江南道里長荆襄在何處聞郎昨夜語五月瀟湘去

隴頭流水歌三疊代內作

隴水鳴咽流各自東西下生男不下堂生女棄中野
下隴磨剪刀刀澀指爪柔將刀割斷水那用東西流
隴水鳴不止似聞阿兒語出門不見人肝腸斷絕汝



御選明詩卷八



總校官庶吉士臣侍朝
校對官檢討臣蕭九成
騰錄舉人臣傅瓌芳